

Jones y jogn nasciüs l'ann 2008 y i nasciüs l'ann 2009 co ará complí 16 agn cina le de dla Crejima, preodü por Pasca de ma 2025 (08.06.2025), é bel enviés da gní con geniturs, totes y toc y enteressés ales **seres d'enformaziun con Markus Felderer**, direttur dal ufize por la catechesa, sora le tru de preparaziun ala Crejima, co met man cösc altonn. Chisc é i termins: ai 28 d'aorí ales 20:00 a Badia, tla Ciasa Runcher o **ai 12 de ma ales 20:00 a Al Plan**, tal salf dla Raiffeisen. - Do cöstes encuntades gnarál fissé te vigne ploania na data por tö sö l'**iscriziuns ala preparaziun** (NB: nia ciamó ala Crejima!). Cösta mess gní fata dal jonn o dala jona personalmonter, zonza geniturs.



## Vita de ploania y de paisc

- **Cor de dljia:** le cor de dljia i dij en gran iolan y Dio s'al páii a düc chi co á fat na spenora por la uniun en la festa de Pasca. **Iolan de osc sostegn**
- **lade por sanc: le KVV d'La Pli y d'Al Plan organiseia en lönesc al 1 de ma en pelegrinaje a Maria Weissenstein.** An vá con en bus, co peia ia ales 6:15 da La Pli, ales 6:30 da Al Plan y ales 6:45 da Longega, cina al Karersee y da enló a pe cina a Schwarzenbach y spo endô con le bus cina a Deutschnofen. L'ultimo toch ván endô a pe por le tru dles staziuns cina a Weissenstein (nia de fadia). Ales 15:00 sarál enló na santa messa. Dedô vegnon endô con le bus a ciasa. Cost: 20,00 €. Preitambel se prenoté cina ai 26 d'aorí pa Hartmann Frontull, ☎ 345 7274593.



## 1 Enformaziuns y termins

**De dal ambiont – müdaziun de termin:** le Comité dai Jogn dal Comun de Mareo envieia düc canc a to pert al de dal ambiont. Cösc de é gnü sposté dala sabeda ai 15 ala **sabeda ai 22 d'aorí**. I piun ia ales 09:00 dal paiun dla Musiga y dales 13:00 ennant s'encuntunse ia Al Plan, danló dal paiun dla Musiga, por na bona marena.

**Invit a les Rites** da jí a Weissenstein le lönesc, ai 22 de ma, dé de santa Rita, con santa messa y marena. Preibel se prenoté pa Rita Verginer da San Martin, ☎ 335 1019128 cina la domegna ai 14 de ma.

**Curs de Pröm Aiüt:** la Uniun dles Eres d'Al Plan organiseia en curs de Pröm Aiüt - sei da reagí te caji d'urgenza - por geniturs de mituns fina ai 12 agn. Le curs ven tegní ai 26 de ma, dales 18:00 ales 22:00 tal salf dla Cassa Raiffeisen d'Al Plan. Le cost é de 15 € a porsona. An pó se prenoté cina ai 12 de ma Anna Maria, ☎ 3287 880348.

**Döt le bun a:** Florian Ellecosta, *Campitello di Fassa* \* 19.04.1938  
Ludwig Willeit \* 20.04.1937  
y a düc chi co á santennom y complesc i agn cöst'edema


**Impressum:** Ploania d'La Pli; redaziun Franz Rigo y Edith Willeit  
**Comunicaziuns:** cina le **dedemesaledema** sera a Franz Rigo, ☎ 347 2310129 o ✉ ploania@gmx.net  
**Download plata:** [www.unitepastorala.org](http://www.unitepastorala.org)



# Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas  
✉ [klsottsas@rolmail.net](mailto:klsottsas@rolmail.net)

Calogna Al Plan: ☎ 0474 501006  
Radio de Ploania: 93,00 MhZ



Ann A

16.04.2023 - **Secunda domegna de Pasca**  
**Domegna biancia - Domegna dla misericordia de Chel Bel Dio**

n. 21

## Deache te m'as odü, Tomesc, creieste. Beac é chi co ne veiga nia y crei empó! Alleluia.

(aclamaziun dan le Vangelo)

📖 **St.Ap 2, 42–47 | 1 Pire 1, 3–9 | Jan 20, 19–31**

*La Domegna Biancia á cösc ennom dal quant blanch che i catecumeni, o chi co ea gnüs bacés en Pasca, portâ cina la domegna do la festa de Pasca. Le corú blanch é segno de vita nea da cristians. Tla Storia dai Apostui vegnel recordé la vita dla pröma comunité cristiana co é de ejempl desche cristians vir deboriada y con enstusiams söa fede: mo empó ará nosta fede dagnora endô da tegní fora proes y dificultés (1ª letöra). L'encuntada de Gejú con l'apostul Tomesc demostra che Gejú ne slüj nia fora chi co se fej êrt da creie. Le rosserí azeta cinamai les condiziuns che so apostul iera por podei creie, ince sce con l'amonimont: "Deache tö as odü creieste. Beac chi co ne veiga nia y crei empó! (vangelo). Co che ara dess ester pordert, scrí San Pire te söa letera ai cristians dal dagní: "EI ne n'eise nia odü, y empó ti oreise bun." (2ª letöra)*

### Dal Vangelo do San Jan:

[...] <sup>26</sup>Otedé do ea sü discepui endô abinés adöm, y Tomesc ea lapró. Danló é gnü Gejú – les portes ea slütes pro – é jü amesa ei ete y á dit: Pêsc a os!  
<sup>27</sup>Spo ti ál dit a Tomesc: Ten ca to deit – atló é mies mans! Ten ca töa man y metela te mio costá, y no sté a ester descredont, mo credont!  
<sup>28</sup>Tomesc ti á respognü: Mio Signur y mio Dio!  
<sup>29</sup>Gejú ti á dit: Deache te m'as odü, creieste. Beac é chi co ne veiga nia y crei empó.  
<sup>30</sup>Ciamó trec d'atri segns, co n'é nia scric sö te cösc liber, él sté Gejú co á fat dan dai edli de sü discepui.  
<sup>31</sup>Mo chisc é gnüs scric sö ch'i cherdeise che Crist é le Messia, le Fi de Dio, y ch'i eise, tres la fede, la vita te so ennom.



**Ten ca to deit –  
atló é mies mans**  
Jan 20, 27

📖 *Letöres dla Terza domegna de Pasca:*

**St.Ap 2, 14.22–23 | 1 Pire 1, 17–21 | Lc 24, 13–35 o Jan 21, 1–19**

Edema liturgica dai 16.04. ai 23.04.2023

<b>DOM 16.</b>	<b>Secunda domegna de Pasca - Domegna blancia</b> <b>Domegna dla misericordia de Chel Bel Dio</b> , Bernardette Soubirous
<b>06:30</b>	<b>gran messa</b> por dōta la ploania <i>oferta por le fonds de solidarietè dal clero</i> <b>s.m.</b> por † Matilde Frontull ved. Vollmann, Moradú <b>s.m.</b> por †† Jan y Valeria Ellecosta, Gogn
10:00	gran messa a Al Plan
<b>Lön 17.</b>	Eberhard, Rudolf, Max Josef
<b>19:30</b>	<b>s.m.</b> por vis y †† dla fam. Facchini <b>s.m.</b> por † Jep Lanz, dal Pico
<b>Ded 18.</b>	Aya, Sabina, Alexander
07:30	s.m. a Antermeia
<b>Dem 19.</b>	Leo IX., Werner, Friedrich
<b>Jöb 20.</b>	Odette, Wilhelm
07:30	s.m. a Rina
<b>Ven 21.</b>	Anselm da Canterbury, Konrad da Parzham
07:20	s.m. a Al Plan
<b>Sab 22.</b>	Wolfhelm, Cajus
<b>07:30</b>	<b>s.m.</b> por vis y †† dla fam. Ploner, Corterei <b>s.m.</b> por les families Trebo, Craizer
18:00	s.m. prefestia a Al Plan
<b>DOM 23.</b>	<b>Terza domegna de Pasca</b> Georg, Iorz (patron da Pliscia), <b>Domegna de San Ciascian y San Vigile</b> Adalbert, Fortunato
06:30	gran messa a Al Plan
<b>09:30</b>	<b>corona:</b> i periun por les families
<b>10:00</b>	<b>gran messa</b> por dōta la ploania <i>oferta por l'Università Catolica de Milan</i> <b>s.m.</b> en onú de Santa Maria por les families <b>s.m.</b> d'aniversar por † Ida Frontull, Mareo <b>s.m.</b> d'aniversar por † Jan Maneschg, da Poz <b>s.m.</b> por †† Berta (aniversar) y Siegfried Frontull, Janin <b>s.m.</b> por la familia Hubert y Marta Ploner, La Pli <b>s.m.</b> por †† Jan y Nane Rigo, Alnei <b>s.m.</b> por † Hubert Frontull, Casun
<b>15:00</b>	a Pliscia, <b>s.m.</b> en onú da San Iorz por vis y †† dla fam. Kastlunger, Mone da Pliscia
<b>ministronc:</b>	<b>• lönesc y sabeda:</b> Paul y Ivan <b>• domegna:</b> Francesco O. y Jacklyn, Rudi y Filip
<b>i recordun:</b>	Germana Lanz Pezzei, Schweiz † 10.04.2014 Jan Maneschg † 18.04.2019 Ida Frontull † 18.04.2020 Matthias Ellemunter, Sexten † 21.04.2019



Odei con i edli dla fede

**I ponsun do:**

Tomesc crei a ci co é da odei, y nos fajun normalmonter ince ensciö. Da el endere messunse emparé che la fede ne pó nia s'architè pa ci ch'an veiga. Le monn vir dles porsones, co ne se ten nia ma a ci co é da odei, mo descür endluch la potenza de Chel Bel Dio. La odlada sön la parora y les operes de Gejú y sön söa maniera persuasiva, adöm ala sügherte da podei se fidé dai pröms testimoni, se deida odei tan de fostüs de Chel Bel Dio tles porsones y tla creaziun. I sontiun che Chel Bel Dio arvenn nosta vita, i odun ete che la creaziun é na söa scincunda por nos y i ciafun enló tan trep co se lieia a d'atres porsones.

**I periun:**

Bel Dio, pordonn y pêsc é les gran scincundes de Gejú rosserí a sü discepui. Scínchesse ince a nos la fede che le Signur vir y opereia amesa nos. Por Gejú Crist, nosc Signur.

Vesco Wilhelm Egger  
"Sonntagsbibel"

**I simboi cristiagn cuntés ai mituns (13)**



**La löm y les cianderes**

La löm s'acompaneia dōta nosta vita. Chi co é bacés, á na ciandera dal Bato. I mituns co va ala Pröma Santa Comegnun porta ince na ciandera sön alté. Les cianderes enfornesc la ciasa de Chel Bel Dio y i altés.

La löm se recorda che Chel Bel Dio é dlungia nos. El é la löm co para demez la scürité. Ci che cösc ó dí, se mostra Chel Bel Dio tres Gejú, so Fí. El dij: „lu sun la löm dal monn“ (*Vangelo do San Jan 8,12*). Cösc o dí ch'i viun tal lominus dal amur de Chel Bel Dio. Con Gejú desco nosc compagn co se stá dlungia, n'ánse nia bria da avei tema.

Mo Gejú dij ince: „Os seis la löm dal monn“ (*Vangelo do San Mateo 5,14*). El ó ch'i portunse söa löm y söa bona noela a dōtes les porsones con s'orei bun y se daidé önn y l'ater.

Les cianderes se lascia sontí te na maniera particolare che Chel Bel Dio se stá dlungia. I les empiun canch' i festejun la Santa Messa, les festes dal ann liturgich y les festes de nosta vita. Les cianderes empiades sön alté se lascia sontí che Gejú é danter nos.

La ciandera dal Bato acompaneia nosta vita. Ara se recorda che i sun „fís dla löm“. Chel Bel Dio s'acompaneia con so amur.

**La gherlanda d'advent**

Les cater cianderes sön la gherlanda d'advent é en simbol por l'aspeté a Gejú, la löm dal monn. Con vigne ciandera che i empiun rounse plü dampró ala festa dal Nadé de Gejú. Da Nadé él spo dōtes cater les cianderes co verd y adöm ales löms dal len da Nadé fejeres en bel lominus. I sontiun che con le Nadé de Gejú ven le monn plü lominus y plü bel.